



JU OŠ "Umihana Čuvidina"

Broj: 32

Evrovizija

# Ačur



Radovi naših

Predstavljamo

Maj, 2016.



# JU OŠ "Umihana Čuvidina" Sarajevo

## Ađul—školski časopis



### Urednici

### Članovi Novinarske sekcije

Anida Đipa	Belma Šikalo
Anida Tinjak	Asja—Šaha Tucaković
Nejra Pezo	Ajša Osmanović
Nedžma Maksumić	Hana Isljami
Edna Krasnić	Anesa Šesto
Selma Tošić	Amra Šehović
Amina Dudo	Midhat Nuhović

### Voditelj Novinarske sekcije

Ramiz Dedić

### Tehnička obrada

### Članovi Informatičke Sekcije

Lejla Bešlić	Emir Ćuprija
Hena Peštek	Hanan Cibra
Nejra Tinjak	Erna Isaković
Ahmed Karić	
Salem Mulić	

### Voditelj Informatičke sekcije

Elma Botulja



**"Čovjek koji nema maštu, nema ni krila"**

E-mail: umihanac@bih.net.ba

## *Intervju sa direktorom škole, Azizom Mušahmetovićem*

**Poštovani gospodine direktore, velika nam je čast što ste odvojili vrijeme kako biste odgovorili na nekoliko pitanja koja zanimaju nas i ostale članove Novinarske sekcije.**

**Adžul:** Možete li nam reći da li ste zadovoljni postignutim rezultatima u školskoj 2015./2016. godini?

**Direktor:** Jesam zadovoljan, ali uvijek može bolje. Pogotovo u sportskom dijelu. Volio bih da se popravi stanje i u nastavnom odnosno predmetnom, naprimjer takmičenja iz matematike, fizike i ostalih.



**Adžul:** Možete li istaći rezultate sa kojima ste posebno zadovoljni?

**Direktor:** Najviše sam zadovoljan sa sportskim rezultatima. I iz oblasti matematike.

**Adžul:** U našoj školi ima zaista mnogo talenata u raznim oblastima, dosta je bivših učenika ove škole postalo uspješno na raznim poljima, postali su značajni i veliki ljudi, da li Vi možete izdvojiti neke učenike koje vidite u posebnom svjetlu?

**Direktor:** Čuli ste za Harisa Duljevića, Eldara Hasanovića. A u ovim generacijama vidim Čano Mustafu, Suanu Tucaković i Huseina Gogića. Ali to su samo neki.

**Adžul:** Možete li nam reći šta mislite o ekskurziji koja je bila održana u ovoj školskoj godini?

**Direktor:** Veoma uspješna ekskurzija. Prepoznatljivi smo što se tiče odnosa prema imovini, odnosa prema stanovništvu. Uvijek smo pohvaljeni. Najkorektnija i najodgojenija djeca su upravo iz ove škole.

**Adžul:** Da li mislite da su učenici devetog razreda stekli dobru podlogu za upis u srednju školu?

**Direktor:** Mislim da jesu. Konkretno, ova škola ima stručne i kvalitetne nastavnike. Učenici koji izadžu sa određenim uspjehom, pokažu taj uspjeh i u ostalim školama.

**Adžul:** Šta na kraju možete poručiti vašim učenicima?

**Direktor:** Da slušate, prije svega, roditelje, svoje nastavnike. Da učite. Imam za vas poruku. Da bi ostali u mjestu, morate trčati. Trčati u mjestu, znači uvijek steći nova saznanja, komunikacije. Ne komunikacija preko facebook-a i mobitela, nego živa komunikacija.

**Adžul:** U ime školskog lista Adžul i u naše ime Vam se zahvaljujemo na iskrenim odgovorima, obećavamo da ćemo se uvijek sjećati divnih trenutaka u školi.



# Dešavanja u školi

## Svečani prijem prvačića



U utorak, 01.09.2015.g., održana je svečanost povodom svečanog prijema prvačića.

Svečanosti su prisustvovali i poželjeli uspješan početak nove školske godine, direktor škole Aziz Muhamedović i predstavnici Općine Novi Grad, predsjedavajuća Općinskog vijeća Edina Gabela i pomoćnik Općinskog načelnika za obrazovanje, kulturu i sport Elvir Resić.

Općina Novi Grad Sarajevo organizovala je u dvorani na Mojmilu, za 1.206 prvačića novogradskih osnovnih škola, dječiju manifestaciju „Prvačići, sretno!“.

Podijeljeni su im i poklon-paketići sa školskim priborom, koje je za njih obezbijedila Općina Novi Grad Sarajevo.



*Dragi prvačići neka vas  
sreća i uspjeh uvijek prate!*



# Ekspedicija učenika IX.-og razreda

## Kružno putovanje kroz BiH i Hrvatsku




U pratnji razrednika i direktora škole, učenici IX razreda su u periodu od 15.09. do 19.09.2015.g. otputovali na ekskurziju - proputovanje kroz BiH i Hrvatsku. Prvi dan su obišli Jablanicu, Konjic i Mostar i uživali u njihovim znamenitostima. Drugi dan su posjetili Malakološki muzej sa bogatom zbirkom školjki i puževa na svijetu. Treći dan su otputovali u Split i posjetili njegove znamenitosti, Dioklecijanovu palaču, antičku građevinu staru 1700 godina. Četvrtog dana su putovali trajektom na relaciji Drvenik - Sućuraj (Hvar). Ekskurziju su završili posjetom Počitelju, obilaskom Tekije na Buni i povratkom u Sarajevo.



# Naši sportisti I dio

Učenica **Suana Tucaković**, razred V-1 je **12.09.2015.g.** na Otvorenom prvenstvu Tuzle u tenisu (kategorija 12 godina) osvojila je **2. mjesto**.


U period od **27.02. do 06.03.2016.g.** predstavljala je Bosnu i Hercegovinu na Međunarodnom teniskom turniru, **30. Memorijal Slavoj Greblo 2016, U12 Tennis Europe u Umagu, Hrvatska.**



**31.10.2015.g.—**  
Na humanitarnom karate turniru „**Kafa za Sipu**“ naša vrijedna učenica **Serhatlić Ajla**, osvojila je **2. mjesto** u kategoriji djevojčice 2005.godište, a na **5. kantonalnom prvenstvu u karateu za djecu, kadete, juniore i U21** održanom **14.11.2015.g.** osvojila je **2. mjesto i srebrenu medalju**.

**15.11.2015.g.—**Na turniru povodom obilježavanja

*Dječije nedjelje*, naše učenice, članice KK „**Sampi**“, **Aida Đozo i Ajla Đozo** osvojile su **zlatne medalje**, dok su učenici **Elnur Salihić** i **Faruk Kurtić** osvojili **srebro**.





# Malonogometni turniri



21. 09.2015.g — Na stadionu „Braća Kadić“, Boljakov Potok održan je tradicionalni **malonogometni turnir „Memorijal 2. viteška brigada“**. Našu školu predstavilo je 11 učenika V i VII razreda. Utakmice su odigrane protiv osnovnih škola „Aleksa Šantić“, „Sokolje“ i „Fatima Gunić“, rezultatima 2:1, 4:0 i 4:0 za našu ekipu. Fudbalska ekipa OŠ „Umihana Čuvidina“ osvojila 1. mjesto, a učenik **Asmir Lukovac** proglašen je za najboljeg strijelca turnira.



20.12. 2015. g — U povodu obilježavanja Dana Općine Novi Grad Sarajevo u Sportskoj dvorani "Ramiz Salčin" - Mojmilo održan je Turnir u malom nogometu pod nazivom **18. Memorijalni turnir u malom nogometu "Šehidima i poginulim borcima Novog Grada 2015."**. Učenici naše škole osvojili su 3.mjesto.



# Centar za edukaciju, sport i rekreaciju "Safet Zajko"



21.09.2015. g u novogradskom naselju Halilovići svečano je otvoren Centar za edukaciju, sport i rekreciju „Safet Zajko“. Učenici i nastavnici naše škole, na čelu sa direktorom Azizom Muhamedović prisustvovali su ovom svečanom činu. Svojim sportsko-rekreacionionim prostorom sa puno sadržaja, dječijim parkovima i prirodnim ljestvama, Centar će upotpuniti i naš odgojno-obrazovni rad.



Učenici naše škole su tokom školske godine posjećivali Centar "Safet Zajko" i uživali u njegovim sadržajima.



# Učenici naše škole obilježili Evropski dan jezika

Evropski dan jezika se obilježava 26. septembra u 47 zemalja članica Vijeća Evrope.

U sklopu nastave stranih jezika, engleskog i njemačkog jezika, obilježen je Evropski dan jezika i u našoj školi.

Cilj radionice je bio da učenici kroz edukativne igre, bojenje i glumu razvijaju ljubav prema stranim jezicima.



Učenje jezika je korisno za mlade i za starije - nikada nije kasno da se nauči novi jezik i uživa u mogućnostima koje učenje novog jezika pruža. Učenje drugih jezika pomaže da se bolje razumijemo i prevaziđemo kulturološke razlike, bilo da smo na odmoru ili živimo u drugoj zemlji.



# Dan nastavnika



Širom svijeta 5. oktobar se obilježava kao *Svjetski dan učitelja*. Zbog toga je ovaj dan, u školskom kalendaru, upisan kao nenastavni (za učenike), ali radni dan (za nastavnike). Uposlenici naše škole ovaj dan su obilježili izletom u Travnik.



Na konkursu za likovne i literarne radove učenika/ca osnovnih škola u Kantonu Sarajevo o temi: „MOJA ŠKOLA JE ...?“ povodom Dana nastavnika Kantona Sarajevo 3. mjesto u kategoriji likovnih radova učenika od I do IV razreda osvojila je Jasmila Lolić, učenica IV-4 razreda.



# Međunarodni dan štednje

23.10.2015.g. predstavnici Hypo banke posjetili su OŠ „Umihana Čuvidina“ Sarajevo i u sklopu donatorskih aktivnosti, povodom Međunarodnog dana štednje, uručili opremu u vrijednosti 4.000 KM. Školi su kroz donaciju osigurana 2 računara, laptop i projektor.

Predstavnice banke, Enisu Avdićaušević, voditeljicu Hypo poslovnice Hrasno i Đelmu Grgić, regionalnog menadžera prodaje, ugostio je direktor škole Aziz Muhamedović.

Direktor je Hypo predstavnicama prezentirao dodatne aktivnosti koje škola provodi s ciljem unapređenja kvalitete obrazovnog procesa te se zahvalio na uručenoj donaciji. „Zadovoljstvo mi je što imam priliku da vas ugostim i zaista mi je draga što ste ovu školu prepoznali i odlučili da upravo nama pružite podršku u radu kroz donaciju“, istakao je Muhamedović prilikom uručenja donacije.



U sklopu posjete školi, predstavnice banke ugostilo je i jedno odjeljenje učenika drugog razreda. Učenicima su prezentirane vrijednosti štednje i uručeni su im simbolični Hypo darovi.



# Edukativna druženja

U novembru 2015.g. učenici II i IV razreda su posjetili Muzej književnosti i pozorišne umjetnosti. U Muzeju su učenici pogledali izložbu koja je organizirana povodom obilježavanja stogodišnjice rođenja Branka Ćopića.



U novembru 2015.g. održana je edukativna i interaktivna "Radionica pozorišta i filma" za učenike od II do IX razreda. Kroz smijeh i šalu, učenici su imali priliku da nauče nešto novo o filmskoj i pozorišnoj umjetnosti kroz interaktivnu predstavu, gdje su i sami pokazali svoje glumačke sposobnosti. Cilj predstave je da se kod učenika razvije pozitivan stav o pozorištu kako bi stekli naviku i želju da postanu buduća pozorišna publika. Sa učenicima su se družili glumci Nebojša Čolić, poznatiji kao Fiko iz Kursadžija i Ljubo Blagojević - Čarli Čaplin.



priliku da nauče nešto novo o filmskoj i pozorišnoj umjetnosti kroz interaktivnu predstavu, gdje su i sami pokazali svoje glumačke sposobnosti. Cilj predstave je da se kod učenika razvije pozitivan stav o pozorištu kako bi stekli naviku i želju da postanu buduća pozorišna publika. Sa učenicima su se družili glumci Nebojša Čolić, poznatiji kao Fiko iz Kursadžija i Ljubo Blagojević - Čarli Čaplin.





# Projekti



U organizaciji OSCE-a i Ministarstva za obrazovanje, nauku i mlade u prostorijama Hotela Sarajevo održan je dvodnevni seminar o metodologiji "Indeks inkluzivnosti". Nastavnica Elma Botulja, predstavnica naše škole prisustvovala je seminaru. Predavač seminara, gospođa Nihada Čolić, učesnike je upoznala sa načinom primjene inkluzije u školama i kroz radionice im približila Inkluziju u nastavi.



Naša škola je uzela učešće u projektu "Kurikulum za transparentnost, kurikulum za odgovornost" kojeg finansira Evropska unija, a realiziraju CRMA i Udruženje INFHOUSE iz Sarajeva, te OKC iz Banjaluke. Nastavnice Dženana Pačavar i Sanelu Efendić su bile predstavnice naše škole na seminaru. Nastavnica Dženana Pačavar je u okviru ovog projekta na času likovne kulture u I razredu kroz priču "Podmitljivi zeko" upoznala učenike sa pojmom podmicanja. Nasatavnica Sanelu Efendić je na

času odjeljenjske zajednice u VI razredu upoznala učenike sa mogućim reakcijama u konfliktu, sa važnošću donošenja odluka, sa posljedicama određenih ponašanja.



# Naši sportisti II dio

18.aprila 2016.g. na atletskoj stazi stadiona "Asim Ferhatović Hase" održan je **atletski kup osnovnih škola s područja Općine Novi Grad.** Učenici naše škole su se odazvali i učestvovali i na ovom takmičenju. Rezultati su sljedeći:

- **Hana Isljami** u utrci na 600 metara osvojila je **1. mjesto**
- **Omeragić Amra** u utrci na 600 metara osvojila je **2. mjesto**
- **Čano Mustafa** u utrci na 1000 metara osvojio je **2. mjesto.**
- **Redžepović Lamija** u disciplini skok udalj zauzela je **2. mjesto.**



05. maja 2016.g. na stadionu "Koševo" održano je **Finale Atletskog kupa** osnovnih i srednjih škola Kantona Sarajevo. Naš vrijedni učenik **Mustafa Čano** osvojio je **3. mjesto** u utrci na 1000 metara.



Kantonalnog Atletskog Saveza. Rezultati naših ekipa su sljedeći

- ekipni poredak 800 m učenici - VI i VII razredi - **1.mjesto**
- ekipni poredak 600 m učenice - VI i VII razredi - **4.mjesto**



# Naša škola u novom ruhu

Kako bi poboljšala uslove življenja i obrazovanja stanovnika naselja Boljakov Potok, Općina Novi Grad planira proširiti kapacitet škole i izgraditi nove sadržaje koji nedostaju ovom naselju. Završen je idejni projekat za proširenje škole, kojim je predviđeno proširenje objekta za još 11 učionica, zatim izgradnja sportske dvorane, te obdaništa za boravak oko 100 djece i ambulante porodične medicine.

Sportska dvorana dimenzija  $44,60 \times 26,75$  metar, sa fiksnim tribinama sa 185 mjestima, moći će se koristiti za košarku, odbojku i fudbal. Cijeli prostor ispod dvorane bit će iskorišten za izgradnju garaže za potrebe škole i naselja. Ispred škole i



sportske dvorane predviđeni su otvoreni tereni za potrebe dječjeg obdaništa i otvoreni tereni za potrebe škole, koji će biti ograđeni. Ideja o dogradnji škole se poteže od 2005.godine, da bi nakon 10 godina idejni projekat ugledao svjetlost dana zahvaljujući ljudima koji znaju šta znači ulagati u obrazovanje. Obrazovanje je temelj svakog društva, ističe direktor škole, mr.sci. Aziz Muhamedović.

# Predstavljamo



**IX-1 sa razrednikom Dedić Ramizom:** Bećirović Mirnes, Čoković Sumeja, Ćatić Kenan, Ćosović ahmed, Džanko Faris, Džeković Belma, Dželović Faruk, Đipa Anida, Fazlagić Nedim, Hodžić Semina, Hodžić Hamza, Imamović Eldar, Krasnić Edna, Maksumić Nedžma, Memić Adna, Nuhović Midhat, Osmanković Ajla, Papić Amra, Plavčić Nadina, Salčin Kenan, Sarač Alma, Smajić Arnes, Tinjak Anida i Tošić Selma.



**IX-2 sa razrednicom Gasal Aidom:** Beganović Anes, Čano Mustafa, Dudo Amina, Hodžić Zuhra, Hodžić Aldin, Ilić Andrej, Imamović Aden, Kriještorac Vanesa, Majstorić Elmin, Mirvić Ajdin, Muraspahić Adi, Omeragić Jasmin, Pezo Nejra, popara Ilhana, Poturak Amina, Sadiković Lejla, Sadiković Aldin, Subašić Elvedin, Šikalo Belma, Tucaković Asja-

# maturante



**IX-3 sa razrednicom Voloder Sabinom:** Baždar Dženefa, Bjelak Ali, Čičak Vedad, Čuturić Almedina, Džuho Rijad, Hodžić Sanjin, Hodžić Šejla, Hukara Faris, Isljami Hana, Kunić Amar, Ligata Azra, Memić Amel, Mešić Harun, Muftić Vahid, Osmanović Ajša, Pramenković Fatih, Salihagić Armina, Sefer Tarik, Sućeska Zejd, Šorlija Ervin, Trifković Danijel i Zagorac Almina.



**IX-4 sa razrednicom Slatina Sućeska Jasminom:** Abaz Selim, Čavrk Aidin, Delić Anela, Duljević Belma, Džeko Hamza, Džindo Nedim, Đip Armin, Halilović Ajla, Hodžić Džanelia, Išerić Nermin, Kajanija Melisa, Karić Nejla, Kljuno Alen, Mujezinović Elmedin, Omerović Almedina, Papić Samer, Prašović Elmira, Salihagić Hamza, Skopak Emrah, Skorupan Bakir, Šesto Anesa, Šikalo Haris i Žunić Almina.

# Zajedno smo jači

Povodom Dana državnosti BiH svečano je otvorena Bosanska soba u našoj školi. U realizaciji ovog projekta su učestvovali učenici, roditelji i nastavnici. Tokom drugog polugodišta razrednici svih odjeljenja su sa svojim učenicima posjetili Bosansku sobu.




U decembru 2015.g. u sklopu projekta "Kad se složne ruke spoje" je u holu škole upriličena je prodaja novogodišnjih čestitki. U izradi novogodišnjih čestik učestvovali su učenici naše škole sa voditeljima sekcija: Likovne kulture, Tehničke kulture i Kulture življenja. Povodom novogodišnjih praznika realizovan je projekt "Pokaži šta znaš". Učenici su kroz ples, pjesmu, glumu, sviranje, recitaciju, igrokaze, sport i ostale aktivnosti, pokazali svoj talent. Učešćem u projektu "Jedan paketić za jedan osmijeh", učenici i nastavnici JU OŠ "Umihana Čuvidina" pokazali još jednom svoju humanost prema svojim dugarima slabog materijalnog stanja



# Hour of code - Sat kodiranja

Naša škola je bila učesnik najvećeg edukativnog događaja u svijetu koji se održava u periodu od 07.12. do 13.12. 2015. god. - **Hour of Code**. U ovom projektu su učestvovali učenici od I do IX razreda naše škole. Cilj samog projekta je da se na

kreativan i zabavan način razvijaju različiti načini mišljenja i rješavanja problema za što bolji uspjeh u digitalnom svijetu. Bitno je upaliti iskru kreativnosti na zabavan način i probuditi male inovatore. Na jednom satu kodiranja sa našim učenicima su se družili i okušali u kodiranju Elvir Resić, pomoćnik Općinskog načelnika za obrazovanje, kulturu i sport, predstavnici CPCD-a, direktor i pomoćnica direktora škole.



U prostorijama Resursnog centra CPCD-a 16. marta 2016.g., održana je završna svečanost „Sata kodiranja“. Na događaju su bili prisutni svi učenici, nastavnici i škole koji su pobijedili na nagradnoj igri, koju je ovom prilikom organizovao CPCD u suradnji s partnerima. Drugo mjesto za nastavnike za najveći broj uključenih đaka u projektu dobila je i naša nastavnica informatike **Elma Botulja**.



# Zabavno je bilo ...

## ŠKOLA ALPSKOG SKIJANJA



U periodu od 08.02. do 12.02. 2016.g. na igmanskom Malom polju Školu alpskog skijanja je pohađao 51 učenik šestog razreda. Školu alpskog skijanja je organizirala Općina Novi Grad Sarajevo u saradnji sa J K P Z O I 8 4 . Za rad sa polaznicima škole zaduženi su licencirani instruktori, a za sve učenike osiguran je i prijevoz od škole do skijališta, kao i kompletna skijaška oprema, korištenje ski liftova i hrana.

## ŠKOLA PLIVANJA

U periodu od 14.03. do 21.04. 2016.g. na Olimpijskom bazenu Otoka je realizovana Škola plivanja za učenike IV i V razreda. Općina Novi Grad Sarajevo finansira projekat obuke neplivača iz 14 osnovnih škola s područja Novog Grada koji je uključuje i prijevoz učenika. Osnovni cilj projekta je povećanje plivačke kulture i smanjenje broja neplivača. Naši osnovci sa radošću i uživanjem odlaze na časove plivanja u pratnji svojih nastavnika.



# Edukativna druženja

U martu 2016.g. članovi historijske sekcije sa nastavnicom **Senadom Jusić** posjetili su sarajevsku Vijećnicu. Uživali su u edukativnom obilasku ove prekrasne građevine. Pogledali izložbu fotografija posvećenu ženama autora Samira Hadžića pod nazivom "Born to touch your feelings - Rođena da dotakne vaša osjećanja" i stalnu postavku fotografija pod nazivom "Sarajevo 1914-2014".



U aprilu 2016.g. učenici prvog razreda naše škole, u pratnji učiteljica i učitelja, posjetili su **Narodno pozorište Sarajevo** i uživali u baletu "Palčica". Nakon toga, učenici su prošetali ulicom Ferhadija upoznavajući se sa znamenitostima grada Sarajeva - Katedarala, Begova džamija i uže gradsko jezgro Baščaršije, zatim se fotografisali pored Sebilja.

Poslije edukativne šetnje i terenske nastave, slijedio je ručak na Baščaršiji, sarajevski čevapi. Šetnju su nastavili kroz Kazandžiluk, gdje su učenici mogli vidjeti rukotvorine sarajevskih zanatlija. Učenici su oduševljeni posjetom, jer većina njih je prvi put posjetila Narodno pozorište, a i neke dijelove grada.



# Volim da pišem ...

## MOJ DOM


Između mnoštva velikih kuća i snova, na uzvišenju gdje se sunce budi, pored najljepše cvjetne livade, gdje životinje snivaju, nalazio se moj mali dom koji je bio moje utočište od sivih dana, od umora i briga. Skrio se kao spas i bijeg od realnosti i već godinama tu je. Tu da se izdvaja po unutrašnjoj složnosti, toplini koju pruža i ljubavlju kojom zrači. Dom.. Zapravo šta je pravo značenje te riječi. Da li je to kuća u kojoj svi žele živjeti jer ima mnoštvo spratova, ali se ipak čuje svađa između sestre i brata. Ili je to mala koliba gdje dječica žive sretno i voljeno.

I sada, kada me život odveo na drugu stranu svijeta, još uvijek nikada ne mogu zaboraviti moj pravi dom. U Sarajevu, ulici Vitkovac, nalazila se kuća u kojoj sam živjela. Nije bila mala, niti prevelika, bila je dovoljna za jednu porodicu. Kapija bi škripala i davala znak da neko dolazi. Oko kuće, nalazio se divni voćnjak i cvjetnjak. Davao je poseban izgled našoj kući, posebno u proljeće, kada rascvali jorgovani zamirišu, behar po drveću i lagani vjetarac koji ih njiše. To je bilo posebno godišnje doba za moj dom.

Odlučila sam da posjetim, moj dom, da osjetim kao nekada, pravu toplinu i samo značenje riječi "dom". Laganim sićušnim koracima, koračala sam ulicom, a moje misli su me vratile u djetinjstvo i dane provedene u sarajevskoj mahali, sa barbikama u rukama, klepećući štitklama, igre kuhanja, od kojih smo svaki dan dolazili kući u blatu i prljavoj odjeći. Polako sam silazila niz strmu ulicu, za koju sam oduvijek govorila da ne postoji gora od nje.

Podigla sam glavu i vidjela, moj dom. Suza je potekla, niz moje lice, ostavljajući mokar trag za sobom. Još uvijek ne znam da li je to bila suza od sreće ili od tuge. Od sreće, što vidim svoj dom, svoju prošlost, djetinjstvo, odrastanje u njemu, ili od tuge, što su ti dani prošli i što nisam u svom domu.

Svaki detalj sam pregledala. Toliko stvari se promjenilo. Voćnjak i cvjetnjak su napušteni. Pogledi su mi letjeli na sve strane. Na početku voćnjaka, ugledala sam onu našu porodičnu jabuku, koja je skoro svake godine davala sve više plodova. To je drvo mog djetinjstva, odrastanja. Ovih zadnjih godina, kako dolazim, kao da polako umire. Sigurna sam da joj falim, da sam joj potrebna kako bih vodila brigu o njoj. Počela sam joj pričati, kao čovjeku, kao da me razumije, kako mi je falila sve ove godine. Suze su se nizale jedna za drugom, kao i slike u mojoj glavi. I dalje osjećam toplinu ovog porodičnog doma, koji nikada neće proći.



Ljubičice bi iscvali, a ruže bi izbacile svoj pupoljak. Sjetila sam se, rahmetli nene, za koju sam svaki put pravila buket iz našeg cvjetnjaka. To je bio neki moj ritual svakoga proljeća. A sada, niti ima ruža niti nene.

Držeći ključ u rukama, lagano sam krenula da otključam vrata. Nisu izgledale kao nekada što su izgledale, niti su sada ogromna. Kada sam ušla u kuću, vidjela sam prašinu po svim mogućim predmetima. U hodniku se nalazio veliki ormar, koji je imao ogledalo. I dalje je tu. Stoji na svome mjestu. Pogledala sam se i u ogledalu vidjela malu djevojčicu sa pletenicama, koju češlja mama i sprema je za škole. Nikako suze nisam mogla da zasutavim. U ogledalu, oči su mi bile natečene od plača. Pozivi su dolazili, a ja ni na jedan nisam odgovorila. Željela sam uživati u svome domu, svojoj kući djetinjstva, odrastanja. U kuhinji bi se nalazio naš porodični sto, koji je sada pun prašine i koji je mnogo prljav.

Ovog puta, nije bilo kao nekada, mnogo suđa koji čeka svoje čišćenje. Došla sam do najljepšeg dijela mog doma. Moja soba. Kada sam ušla, osjetila sam toplinu djetinjstva i svih tih dana koji su ostali iza mene, ali koji su sigurno neizbrisiv trag. Tu je bio ormar sa mojom odjećom, potpuno prazan. Moj stol, za kojim bih učila, pisala i crtala. Tu su bili i moji prvi radovi, koje sam šarala raznim bojama. Uzela sam ih i ostavila u torbu. Zidovi su bili išarani hemijskom, jer sam kao malena djevojčica to radila. Na zidu je bilo mnogo postera, od različitih pjevača, glumaca, fudbalskih igrača jer sam sobu dijelila sa bratom. To je bio najveći problem mog djetinjstva, a mislim da i sada onih koji dijele sobu sa svojim bratom ili sestrom. Iako je brat stariji pet godina, uslijedile bi svađe oko igračaka ili čega sve ne. Ali, stvar doma jeste u tome. Ne bih mogla zamisliti pravi dom da nije svega toga. Naš pogled na prozoru, bio je usmjeren prema gradu. Nije se baš video cijeli grad, ali bilo mi je lijepo gledati ga, pogotovo noću, kada mrak dođe i upale se svijetla. Na prozoru je bilo moje urezano ime, koje sam napisala kao seštogodišnjakinja. Sve je bilo mirno i tiho. Sklonila sam zavjese, da moj dom bude okupan Suncem, i otvorih prozor da uđe čist zrak. Zidovi su bili crni, kao da su napukli. Ostala je samo garaža da je posjetim. Bila je puna stvari, automehaničkih ključeva, bušilica, aparata za varenje, šarafcigeri, ali i nekih mojih drvenih okvirova za slike, koje sam pravila sa svojim ocem. Našla sam dekicu i igricu "Ne ljuti se čovječe", koju bih stavili na pod, skupili se svi i igrali. Iako se ta sama igrica zove "Ne ljuti se čovječe", poslije svake bih se ljutila jer gubim. Brisala sam maramicom svoje suze, koje su jedna za drugom silazile niz moje lice.

Vrijeme je bilo da krenem. Lagano sam zaključala vrata svog doma i krenula. Osjetila sam ponovo, šta je to dom i sve ono što ga čini. Tek kad nešto izgubiš, shvatiš koliko ga voliš.

**Nejra Pezo IX–1**



# Radovi naših učenika

## SOBA IZ MOJE MAŠTE

Moja soba iz mašte bila bi smještena na kraju hodnika. Ta soba bi bila dobro osvjetljena i prostra.

U njoj bi se nalazio moj krevet. Široki, mekani krevet na kojem bi bili poredani jastuci. Veliki i mali, mekani i tvrdi, sa slikom i u boji, na kojima bih snila slatke sene, i ujutru se budila odmorna. Pored kreveta stajao bi stolić na kojem bi bio ljubičasti budilnik koji bi me budio iz snova i rekao: „Dosta spavanja, vrijeme je za školu“. Ormar, veliki, debeli ormar, žuti, u obliku smajlića, čuvao bi sve moje stvari, a možda bi bio i skriveni prolaz u njemu, ko zna? Preko puta kreveta stajao bi sto, koji bi imao ruke, svoje ruke, kojima bi mi radio zadaće. Najdraži dio te sobe bi bilo čokoladno drvo, koje bi stajalo na „samopišućem“ stolu. Osnovna boja soba bi bila ljubičasta s malo žute jer se te dvije boje dopunjaju.

Ovo je moja soba iz mašte koju sanjam skoro svake noći.




Lejla Bešlić VI-2

Selma Hasković IV-4



Arijana Kustura VIII-3





## MOJA ŠKOLA

Ima jedno lijepo mjesto,  
Gdje se uči, boji, pjeva.  
Tu sva djeca idu često,  
Tu vas, znajte, sreća čeka.



Neki tamo rado idu,  
Drugima to teže pada.  
Ali posebno to mjesto,  
Traži samo malo rada.



Prijateljstvo tu se rađa,  
Nove stvari tu se uče.  
Učiš kako postat čovjek  
Učiš kako voljet ljudе.

I kad budeš trebao ići,  
Sjeti se ti svega toga,  
Jer rastanak sad se bliži,  
Najljepše je đačko doba!

Tinjak Anida IX-1



## MOJ OTAC

Moj otac je meni najvažnija osoba na svijetu i svaki put ga poslušam, što on jako voli. Meni moj dragi otac mnogo pomaže u životu. Uputio me je u sport, u zdrav život. Podržava me u svim mojim ciljevima, i zbog toga sam mu jako zahvalna, i puno ga volim. Moj otac je uporan u svim svojim ciljevima, dok ne završi neki posao, neće odustati. To mi se mnogo dopada kod njega, pa se i ja nadam da ću i ja biti takva. Meni svi govore da sam visoka za svoje godine, a moj otac se samo slatko nasmije kada to čuje i kaže: „Pa imaš i na koga biti visoka“, jer i on je visok. Moj otac je meni savršen i ja na njemu ništa ne bih mijenjala. On je visok, ima crne oči, smeđu kosu, sportski je tip, baš kao i ja. Većina ljudi mi govori da ličim na majku, ali kada stanem pred ogledalo sa majkom i ocem, ja sama sebi više ličim na oca, i to mi je drago, jer ja više volim oca. Moj otac ponekad zna biti jako duhovit. Otac i ja volimo plašiti nanu i dedu, pa se zajedno slatko smijemo. Ja najviše volim svog oca i uvijek ću ga voljeti najviše na svijetu.



Senada Velić IX-2



22. MART-SVJETSKI DAN VODA  
Dalila Šetkić VIII-4



Ajla Gerin VI-4

# Volimo da crtamo, pišemo, ...

MOJA ŠKOLA



Moja je škola velika nada,  
U njoj su djeca i jaka i slaba.  
Dosta je toga preživjela sama.

Moja je škola zvjezdica sjajna,  
Ona na našoj budućnosti radi,  
I naše korijene sadi.

Dosta je stvari preživjela sama,  
Ali više, brige nema,  
Jer je uz nju vojska đaka njeni.

Selma Hasković IV-4



LJETO

Dolaze nam topli dani  
Prolaze i duge noći,  
Bit ćemo sve više vani,  
Jer će ljetni dani dići.



Školi sad se bliži kraj,  
I raspust nas novi čeka,  
Dolaze nam dragi gosti,  
Dolaze nam dani ljeta.



I kad svane novi dan  
Radosno ga dočekaj,  
Pusti da te ljetno vodi,  
Samu budi radostan.

Tinjak Anida IX-1



## DAJ SVOJ DOPRINOS ZA BOLJI INTERNET

Što mi prvo pomislimo kada čujemo riječ internet ?

Kako je to „šareni svijet“ pun različitih korisnih informacija ? Vjerujem da rijetko tko ili gotovo niko ne pomisli na opasnosti koje prijete na njemu . Pogotovo ne djeca. Trebamo prepoznati dobro od lošeg , ali i da znamo osnovne opasnosti kao što su hakeri i virusi .

Pravila ponašanja na internetu :

Virusi

Prava djece na internetu

Prijetnja na internetu idr .

Cilj je saznati:

Koje stranice djeca posjećuju?

Trebaju li nas kontrolirati roditelji?

Šta znamo o sigurnosti na internetu?

Ponašamo li se odgovorno?

Jesmo li upoznati sa opasnostima

koje nam prijete?

Ustanovilo se da djeca internet najčešće

koriste u zabavne svrhe kao što je dopisivanje s prijateljima , igranje igrica , slušanje pjesama , gledanje

video isjećaka, pregledavanje fotografija ... Najposjećenije stranice su Facebook , Youtube , Skype ,

Twitter , Games At Miniclip ...

Na pitanje trebaju li nas kontrolirati roditelji ?

Roditelji bi trebali kontrolirati svoji djeci samo da vide šta rade i da ih upozore na opasnost.Sigurnost kao pojam : nedavanje osobnih podataka ( adresa , broj mobitela , podatke o roditeljima , podaci o školi koju pohađamo ) te „ ne dopisivanje s nepoznatim osobama “ . Kako učitelji tako i odrasli mogu doprinjeti da djeca shvate pravo značenje interneta .

„ Za mene je internet sreća . Ne bih bila sretna da nemam pristup stranici Facebook . com. “

„ Internet je za mene beskrajna avantura na koju se može doći jednim klikom na ikonu u obliku slova „ e“



MOJA ŠKOLA

Amila Šehić VI-1

Sjećam se tog dana. Bio je to dan kada sam prvi put kročila hodnicima škole.

Jednostavno, njen ljepota i poruke na vratima koje sam čitala kada sam prvi put ušla su me očarale. A znate li šta me još više očaralo? Kada sam ušla prvi put u svoju učionicu i ugledala njen lice, smiješila se tako lijepo da je njen osmjeh treperio na sve strane. Pitate se ko? To je bila moja učiteljica koja se tako lijepo pozdravila sa nama da sam je jednostavno zavoljela odmah. Od tada pa sve do danas i nadalje ona će biti u mom srcu najbolja i najljepša učiteljica zauvijek. Ne samo to, ova škola me upoznala sa još dosta, dosta, dobrih ljudi i još dosta stvari koje nikada neću zaboraviti i koje će mi zauvijek biti u srcu.



Jasmila Lolić IV4



# Gosti našeg časopisa

## MOJ GRAD

Kažu da postoje dva razloga kada čovjek ne želi reći ono što bi možda i trebao.

Neizmjerna bol i prevelika sreća su ono što se najčešće zadržava, nerijetko se odbija dijeliti sa drugima. O tome se mudro šuti. Sve ostalo je manje bitno, te se ne ustručavamo pustiti svoj glas. Ono što duboko čuči u mojim mislima i stvara mi nemir, nije više niti prvi, niti drugi razlog, već nešto treće, što bi se moglo nazvati razumijevanjem. Pitam se da li bi moj nemir neko shvatio ili bi bio uzaludno izrečen.

Moj grad, moje Sarajevo je moj nemir i ono što hoću da kažem jeste to da ovaj grad treba i mora biti ljepši u očima posmatrača. Raskrsnica mnogih kultura i tradicija učinila je ovaj grad duhovno bogatijim. Spoj starog i novog, spoj Istoka i Zapada, samo je razlog više zbog čega brojni turisti posjećuju upravo Sarajevo. Brojne građevine stvaraju jednu šaroliku i nesvakidašnju sliku grada. Međutim, Sarajevo je poput živog bića koje sa sobom nosi i brojne mane, a da pri tome nije krivo. Kada se izgradi most na rijeci, on predstavlja samo jedan njen ukras, sporedan i nikako bitniji od same rijeke. Mostovi na našoj Miljackoj su dodatno zasjenili ovu rijeku. Rijeka koja bi ponosno proticala kroz grad, postala je simbol za otpad, prljavštinu i neugodan miris. Umjesto riba, Miljackom plutaju lopte i razno drugo smeće. Za to nije kriva niti rijeka, niti grad, već ljudi. Dok Miljackom plovi smeće, Sarajevom se slobodno šetaju psi. Sigurno da ne želimo biti prepoznatljivi svijetu po pitanju pasa latalica, ali to je ono što trenutno zasigurno i jesmo. Šetnja gradom, bilo noću ili danju, postala je nesigurna. Razne pljačke, ubistva, razbojništva svakodnevno predstavljaju nezaobilazne teme medija. Maloljetnici su prepusteni ulici, nedoličnom ponašanju, te umjesto bavljenja sportskim aktivnostima, često zaziru u neprihvatljivi način življenja. Sve to, slaba ekološka strana, kulturološki pad samim zatvaranjem muzeja, problemi pasa latalica, razbojništva, sve je tamna strana ovoga grada. On trpi ljudski nemar i nemoćan je da pusti glas i pokuša se oslobođiti sve one boli koja se uvukla u svaku njegovu uličicu.

Riječi su drago kamenje, treba ih pažljivo oblikovati, a onda je njihova vrijednost neprocjenjiva. Svaka sreća, bol, nemir, radost, tuga, satkani su u riječima, a riječi treba glasno izgovarati. Moj razlog šutnje je problem razumijevanja, a nemir moj grad. S toga, hoću glasno da kažem: "Učinimo Sarajevo ljepšim u oku posmatrača!"



Amra Kijamet Kamenjaš



# Evrovizija



10.05.2016. je održano prvo polufinalno veče Eurosoga u Štokholmu. Naši predstavnici, Deen, Dalal, Ana i Jala, se nažalost sa svojom pjesmom "Ljubav je" nisu plasirali u finale ovog takmičenja. Na bini su se pojavili razdvojeni bodljikavom žicom koja predstavlja razdvojenost u Evropi, predrasude i fobije koje imamo jedni prema drugima. Dalal i Ana Rucner su bile prekrivene zlatnim plaštevima koje dobijaju imigranti kada stignu u sigurnu luku, a koje su potom skinule. Ovo je zabilježeno kao prvi put otkako BiH učestvuje u Eurosingu da se nije plasirala u finale. Ovogodišnja pobjednica Eurosoga je predstavnica Ukrajine, Jamala, sa pjesmom "1944.", koja govori o patnji njenog tatarskog naroda i koja je posvećena njenoj baci. Susjedne Hrvatska i Srbija su prošle u veliko finale, ali nisu ostvarile značajniji uspjeh. Srbija je ostala na 19. mjestu, a Hrvatska na 24. Ovogodišnji Eurosog je pratilo oko 200 miliona gledalaca u vijetu, a prvi put se gledao i u Americi.





# Sjećanje na našeg nastavnika

17.02.1957. -  
18.02.2016.godine



**HVALA VAM ZA SVE**

Dragi razredniče, da riječi izrečene u šali mogu da postanu zbilja shvatih i ja sad. Nedavno ste nam rekli: „Ja ću vas ostaviti. Neću vam više biti razrednik.“ Tada šala, danas šok i nevjerica. Da li je moguće i zašto? Sa nama ste bili kratko, ali opet dovoljno dugo da shvatimo da ste najbolji nastavnik na svijetu. Bili ste naš prijatelj, naša utjeha u teškim trenutcima i nade u ono bolje nakon teških trenutaka. Juče sam ponijela sastav o Danu nezavisnosti koji je trebalo da vam predam. Ponijela sam ga i nisam imala kome da ga dam. Danas, evo pišem ovo i opet ne znam kome ću napisano da dam. Moram da vam kažem da smo danas mnogo tužni, ali istovremeno i ponosi, jer je Bog dao da baš nama budete razrednik. Trebalо je još malо pa da nas ispratite u našu novu budućnost. Trebalо je, ali se desiti neće. Dragi razredniče, otišli ste rano i bez pozdrava. Nama, vašem razredu i vašim učenicama ostaje samo da Vam kažemo: "HVALA!!!" Hvala za sve lijepе trenutke provedene sa nama, hvala za sve naučeno, hvala za svaki blagi osmijeh i lijepu riječ koju ste nam uputitli (a bilo ih je mnogo). Hvala Vam što se danas osjećamo ponosno, jer je najbolji nastavnik svijeta bio baš naš razrednik.



Vaš VIII-3

# Naši mali, a veliki umjetnici

## R A S T A N A K

Jedna mala djevojčica hoda sjenovitim putem. Padne i opet se podiže. Stiže do starih oronulih vrata, otvori ih, i ugleda svoj put posut crvenim laticama. Ubode se na trn i malo zaplače. Bez obzira na sve, hoda i dalje tom stazom u nedogled.

Završava se jedno poglavlje, zatvara prva stanica našeg života. Osnovna škola je prvo poglavlje jedne knjige nazvane ŽIVOT. Ovo je trenutak koji smo svi s nekom radošću iščekivali. Prelistavam stranice svoga dnevnika, a uspomene me vrate na devet godina provede u ulici Smaje Šikala. Kažu : "Sve što je lijepo kratko traje", a vrijeme mi je tek sada pokazalo da je zaista tako. Kao da sam jučer drhtavim koracima ušla u učionicu.

Okreće se nova stranica našeg života, ispisana najiskrenijim osmjesima, zagrljajima, suzama, tajnama. Sve to ostaje u zidovima "Umihane", koja će daleko da čuva naše uspomene od zaborava!

Sjećanja me vrtiše, na prvi razred, onu prvu klupu u kojoj bih gledala učitelja, kako nas uči pisati slovo A. Osjećam se ponovo, kao malena djevojčica, učenica I-2 razreda, koja s nestrpljenjem čeka novi dan u školi.

Svi smo bili kao jedna POREDICA, u kojoj se čuju svađice brata i sestre, sestre i sestre, brata i brata. Svađali bi se oko stvari koje smo dijelili zajedno. A to su ko će brisati tablu, ko će ići po užinu ili ipak ko će biti prvi u redu za ulazak u školu. Osjećanja se neprekidno smjenjuju kao dan i noć. Teško je opisati ovu fazu života, kada moraš izabrati neki put, za koji si siguran da nećeš pogriješiti.

Vrijeme je bila za nas velika stvar. Kao maleni učenici, maštali smo o posljednjim danima školovanja, a sada? Sada bih sve dala da se vratim u prvu klupu kao učenica I-2 razreda.

Na kraju smo jednog puta, u kojem smo kući dolazili razbijenih koljena, u kojem smo kidali lutkama glave, razbijali autiće, i pravili još mnoge nestashuke.. Na ovom predivnom putu, prvom poglavlju našeg života, želim se zahvaliti svim nastavnicima koji su nam pružali bezuvjetnu ljubav, podršku. Koji su se iz dana u dan trudili da nas obogate znanjem i životnim vrijednostima. Sve moje uspomene nosim sa sobom, u srcu. S ponosom ću spominjati uvijek da sam bila učenica OŠ "Umihana Čuvidin", koja mi je pružila najbolje oružje za odbranu - ZNANJE.

Nejra Pezo IX-2





Almedina Čuturić IX-3